

DEO OPT. MAX. UNI ET TRINO, VIRGINI DEI PARÆ, ET SANCTO LUCÆ ORTHODOXORUM MEDICORUM PATRONO.

1266

QUÆSTIO MEDICA

QUODLIBETARIIS DISPUTATIONIBUS MANE DISCUTIENDA

IN SCHOLIS MEDICORUM, DIE JOVIS XVI. NOVEMBRIS.

M. LUDOVICO GAYANT Doctore Medico, Præfide.

An Arthritidis origo semper ab Arteriis?

DOLORS inter qui corporis artus occupant, alii medias regiones, quales lues venerea proferre solet, alii articulos obsident, quos Arthritidis nomen complectitur. Hæc est sævus & insignis articulo-
rum dolor ex intervallis ferè invadens. Quilibet anni tempestate recurrit, præcipue vere & autumno. Tor sunt Arthritidis differentia quot sunt ossa quæ per Diarthrosin colligantur: tribus tamen
tantum usus nomina indidit. Chiragra manus infestat, Podagra pedes, Ichias sedem habet ad summam natem circa nervos qui à lumbis & ossæ sacro emergentes feruntur in crura. Quæcumque in alio fi-
gitur articulo, ut immanes humeri, & Omoplata cruciatus, generis nomine appellatur. Altera porro hæreditaria est quæ cum semine migrat in posteros; Altera adventitia, quæ vitæ errore contrahitur,
præsertim Baccho & Venere, maxime illâ quæ corpore erecto exercetur. In quibusdam regionibus putà Moravia & Aultriâ, morbus est Endemius. Pauperes odit, molliùs in umbrâ & otio viventes ag-
greditur. Parcit pueris ante Veneris usum, Eunuchos non adoritur modò sint in victu temperantes & à parentibus Arthriticis non orti. In senibus altas agit radices, in juvenibus citius dissipatur, neutris est le-
thalis. Hujus causâ proxima & continens non est simplex intemperies, sed serofus ichor Articulis firmiter adherens.

ARTHRITIDEM à pituitâ, Bile flavâ vel atrâ non progigni satis patet ex vehementiâ doloris: adde quod humores illi facilè in pus abeunt, cum tantillùm sanguinis habent admixtum, nulla autem
unquàm in Arthritide suppuratio. Restat ergò ut humorem articulis infixum serum esse statuamus, illudque falsum, acre, aut acidum, quod quidem membranas sensu exquisitissimo præditas punge-
ndo, divellendo, prò vario tum acrimoniæ tum tenuitatis gradu diversa profert symptomata. Interdum calorem, ruborem & dolorem latè diffusum cum febre invehit, interdum cum dolore duntaxat se pro-
dit, modò brevi evanescit, sæpe diù discruciat, modò in tophos, & calculos concrefcit, cum scilicet serum aliquid advexit humoris crassioris & excrementitii quod temporis diuturnitate lentescens, tan-
dem indurefcit; vel cum aciditate suâ mucum articulorum cogit.

FLUXIONE fit Arthritis, non congestione. Dolor dexter succedens sinistro novam fluxionem arguit. Humor influens non à cachexiâ ortum ducit, nam cruditas incumbens in pedes tumorem facit
non Podagram. Non ex imi ventris partibus irrupit, viscida enim pituita quæ viscera infarcit, promptè cumulatæque, vel uno die invadere nequit inferiores artus, nedum superiores, cum ad motum
omniò fit inhabilis, & ad illius deterfionem longum temporis spatium exigatur, præterea nunquam reingrat in venas, insipida est, hinc ad feriendum, vellicandum inepta; denique alvi fluxu excitato non
ideo cedit morbus, imò per totum paroxysmi decursum sæpe fluit alvus, eo superficite. Nec ab externis capitis partibus materia coacervata sub cute decurrit in articulos, nam quid opus est ignotas & insolitas vias
comminisci, cum tot natura canales devehendis quocumquè humoribus destinaverit. Hi sunt arteriæ, quæ in universum corpus disseminatæ, & salutare & pravos humores circumferunt: dum acri serofoque
ichore plus æquo abundant, per ipsarum ora tenuis ille humor excidit, qui si detruditur in articulos imbecillè ob viarum amplitudinem, membranarumquè laxitatem, Arthriticis infert dolores. Non tamen
in arteriis hujus morbi fomes semper delitescit.

CEREBRUM omnium ferè fluxionum fons, humoris Arthritidem procreantis origo ab Hippocrate stabilitur. Illud summam corporis partem occupat, temperiemquè obtinet remissè calidam, Osseo
tegumento circumseptum est, neirruentibus extrinsecus injuriis sit obnoxium: Verum nullo munitur adversus intestinos hostes præsidio. Hi sunt tum viscerum æstuantium fervor, quæ vapores falsos
& acres sursum emittunt, qui quidè in hac frigidiori rationis arce (è quâ propter arctam ossium compagem avolare nequeunt) condensantur, & fatali nimbo in membra depluunt, non secus ac vapores ra-
diis solaribus è terrâ elati, qui mediæ regionis frigore concreti in imbrem decidunt: tum humores quilibet copiâ vel qualitate molesti, quibus dum turgidum est inutilem conatur excutere sarcinam in subje-
ctas partes per meatus excrementorum secretioni dicatos, cum per eos se fe exonerare non valet, quâ data porta ruit noxius humor: inde tot morborum genera exurgunt, qualia sunt convulsio, Rheumatismus,
Epilepsia, Apoplexia, Paralyfis.

PALAM est omnibus maximam esse affinitatem Arthritidem inter & Rheumatismum. Arthritici quamplurimi Rheumatismo se correptos prædicant, quasi Arthritis esset eâ divexatis probro & dede-
cori. Hoc est inter utrumque affectum discrimen, quod in illâ humor sit acrior & minori copiâ; Cæterum in eadem parte nempe cerebro utriusque origo sæpe latitat. Et reverà in primo Arthritidis in-
sultu percipitur ut plurimum dolor qui per vertebra in cubitos, & manus, coxendicem, genua, pedesque sensum devolvitur non finè quodam frigoris sensu quo corpus omne perhorrescit: Unde conjici po-
test serosum laticem à cerebro defluere secundum externos spinalis medullæ villos, qui ad articulos usque producantur. Nec propterea is humor Paralyfim efficit, quippe qui internam nervorum substantiam
non pervadit, propter pororum angustiam, & motus rapiditatem, nec convulsionem parit, dum articulis adhærescit, quia in membranis & tendonibus impactus est non vero in principio nervorum.

Ergo Arthritidis origo non semper ab Arteriis?

DOMINI DOCTORES DISPUTATURI.

M. Raymundus Finot.

M. Robertus Raoul, Scholarum Professor.

M. Matthæus Thuillier, Scholarum Professor.

M. Joannes Baptista Ferrand.

M. Carolus Maréau.

M. Antonius le Moine.

M. Ioannes Armandus Marvilain.

M. Bertinus Dieuxvoys.

M. Stephanus Bachot.



Proponebat Lutetiæ PETRUS D'AQUIN, Parisinus, A. R. S. H. MDCLXXIII.